

Tema: Laat jou gedrag voor ongelowiges 'n getuienis wees wat God verheerlik.

Lofprysing ter voorbereiding vir die erediens

Ps. 9-1: 1, 7, 10, 11, 12

Lied 542: 1, 2 - spesiaal vir ons jonger lidmaatjies

Ontmoetingsdiens

Intreelied Ps 24-1: 1(almal), 2 (brs), 3 (srs), 4 (almal);

Votum;

Seën uit Efes 6: 23;

Loflied Ps 138-2: 1, 2;

Geloofsbelijdenis van Nicea

Verootmoedigingsdiens

HK Vraag en antwoord 115;

Gebed;

Wet uit Eks 20

Sing na die wet Sb 8-1: 1, 2

Gebed

Woorddiens

Skriflesing:1 Petrus 2: 11 – 12

Sing Sb 11-4: 2, 3

Woordverkondiging

Antwoorddiens

Gebed;

Liefdegawes;

Gebed vir BNB (die gedrag van gelowiges in SA);

Sing Sb14-1: 3;

Seën;

Amenlied Sb13-2.

Geliefde gemeente

Ek dink ons almal besef dat ons deesdae al hoe meer te doen kry met mense wat nie in God glo nie. Petrus noem hulle “heidene”! Mense wat God nie ken nie, nie wil ken nie en – so kom ons al hoe meer agter – meer en meer agressief praat en optree teen Christene. Ek was hierdie week weer geskok toe ek een oggend na RSG luister en hoor dat die NG Kerk se leierskap ‘n brief aan NG lidmate gestuur het om hulle nie skuldig te maak aan rassisme nie en hoe die mense – ons mense – absoluut krities, afwysend en neerhalend gepraat het oor die kerk en haar getuienis in die wêreld. Wie van julle het die program gehoor?

Nou - sulke ongelowige mense vind ons al hoe meer in ons werkkring, familiekring en selfs vriendekring. Mense wat eenvoudig maar net nie meer in God of die Bybel of die kerk glo nie!

Nou brs en srs, ons leef tussen hulle en ons staan in ‘n verhouding met hulle en daarom gee Petrus in hierdie twee verse drie riglyne wat ons verhouding met hierdie mense moet rig. Hoe ons tussen hierdie mense moet leef. Die metafoor van “vreemdelinge” wat op reis is deur hierdie wêreld wat Petrus reg van die begin in sy brief gebruik, beteken nie dat ons ons van die wêreld en van die mense kan ontrek nie. Dat ons nou maar net ons oë toeknyp en wag vir die wederkoms nie! Nee! Ons is huis in hierdie wêreld geplaas, God het ons soos sout hier gestrooi, sodat ons ‘n getuienis vir God kan wees.

En dit is opvallend dat wanneer Petrus hier in hf 2 vanaf vers 11 tot in hf 3: 12 oor verskillende verhoudinge praat, hy min verwys na ons mondelinge getuienis, maar telkens die klem plaas op ons lewe, ons gedrag, as voorbeeld en getuienis voor die ongelowiges!

Daarom kan ons ook die boodskap en die oproep van die Here na ons vanmore so saamvat: Laat jou gedrag voor ongelowiges ‘n getuienis wees wat God verheerlik.

Die vraag is nou: hoe kan my optrede elke dag ‘n getuienis wees wat God verheerlik?

Petrus gee vir ons 3 riglyne:

1. Ons gedrag word beheer vanuit ons nuwe identiteit in Christus
2. Ons moet eers innerlike reg leef
3. Ons uiterlike gedrag moet altyd voorbeeldig wees.

Kom ons herinner onsself eers net weer aan ons nuwe identiteit wat ons lewe beheer.

Petrus begin hierdie gedeelte deur weer te verwys na die feit dat deur ons geloof in Christus ‘n nuwe identiteit gekry het. Christus het ons deur sy lewe en versoeningswerk aan die kruis en deur die geloof wat Hy aan ons gegee het, deel gemaak van God se koninkryk. Ons lewe word nou beheers deur die feit dat ons aan God behoort en dat ons lewe volgens die grondwet van God se ryk. Dit het ons ook gehoor toe ons vanmore die Tien Gebooie behandel het.

As christene leef ons nie meer volgens die beginsels van die sondige wêreld nie, maar ons leef volgens die wet van God. En alles wat ons dink en doen word deur hierdie nuwe identiteit as burgers van God se ryk, beheers. Dit is hoekom Petrus ons "vreemdelinge" noem! Want ons tree anders op as die mense van hierdie sondige wêreld. Ons word beheers deur God en nie meer die duiwel nie! Ons word nie meer beheer deur ons eie sondige natuur en drange nie, maar deur God se Gees.

Maar, sê Petrus, ons is ook "bywoners". Dit is ook deel van ons nuwe identiteit. En hiermee wil Petrus sê: ons bly tussen die sondige mense van die wêreld. Bywoners, kinders, is mense wat nie self grond of huise kan besit nie, maar by ander mense op hulle grond bly. Wat beteken dit nou vir ons? Dit beteken dat ons moet onthou dat ons nie permanente verblyf hier op aarde moet maak nie – maar : ons leef steeds nou hier tussen ongelowige mense! Sommige verklaarders meen dat die term "bywoners" 'n godsdienstig tegniese term was wat die Jode, wat verspreid oor klein Asië gewoon het, gebruik het om te sê: nou het ons tussen die ongelowiges beland!

En brs en srs , dit is presies wat met ons gebeur! Ons leef nou tussen hierdie mense, ons moet verhoudinge met hulle bou en ons moet dit doen vanuit hierdie identiteit wat God ons gegee het as burgers van sy koninkryk!

Kom ons raak meer prakties: wat beteken dit? Dit beteken dat ons nie kyk hoe maak ander mense en dan tree ons ook so op nie! Nee, ons vra: hoe wil die Here hê moet ek optree! Ek laat my dus nie beheer deur die omstandighede waarin ek is of die mense tussen wie ek leef nie! Ek laat my beheer deur wat God my gemaak het: 'n nuwe mens wat wil leef na God se wil! Dit is my identiteit en daarvolgens leef ek.

Ons kan tog so maklik sê: ja, maar al die mense doen dit! Ek hoor dit baie keer by kinders: ja, ma en pa, maar al my maatjies maak so en daarom wil ek ook so maak! Nee! Ons maak nie soos maatjies maak nie – ons maak soos God sê! Brs en srs, al leef die wêreld rondom ons in die verskriklikste selfsug, eie belang, geldgierigheid, korruksie, wetteloosheid, afguns en jaloesie, haat en rassisme, leef ons nie daarvolgens nie! Ons laat ons nie deur daardie dinge beheers nie.

Dit is hoekom Petrus in die tweede plek vir ons sê: ek dring by julle daarop aan om nie toe te gee aan julle sinlike begeertes nie. Letterlik staan daar: onthou jou van vleeslike begeertes wat stryd voer teen jou siel! Ons gedrag word bepaal deur wat in ons binne aangaan en daarom moet ons eerstens, as burgers van God se ryk, ons innerlike lewe reg leef!

Wat is hierdie sinlike begeertes wat hier binne ons stryd voer? Kom ons lees Gal. 5: 16 – 21. (Lees) Hoor julle? My sondige natuur wil steeds hê dat ek onsedelik, onrein, losbandig, in vyandskap, afguns, skeuring, verdeeldheid, rusies, dronkenskap en uitspattige dinge wil leef! Daaorm moet ons die bid dat die Heilige Gees ons innerlike lewe kan vernuwe sodat nie volgens hierdie dinge leef nie, maar volgens God se wil!

Sien julle nou hoe werk dit? Ons verhoudinge met mense word eerstens bepaal wat in my hart aangaan! En as ek my hart op God gerig kan kry deur die leiding van die Heilige Gees dan bepaal dit my uiterlike optrede! Ek word dus nie beïnvloed deur wat my sondige natuur wil nie, deur wat ander mense sê of doen nie, maar wat God my in die hart gee om te doen wat reg is.

Brs en srs, hoor dan die Here se oproep vanmore! Kyk na hart! Pas jou innerlike lewe op en bid dat die Gees jou lei om daar God se wil te soek en nie toe te gee aan jou sondige begeertes of die versoeking van die wêreld nie.

Want dan sal jou uiterlike gedrag goed en voorbeeldig wees. Dit is wat Petrus ons in die derde plek oproep om te doen! Dat ons optrede, ons gedrag voor mense goed en voorbeeldig moet wees. As my hart vol is van die wil van God, sal my gedrag oor daarvolgens wees! Onthou julle die woorde van ons Here Jesus: waar die hart van vol ons, loop die mond oor! Hy sê in Matteus 15: 18: "wat my die mond uitkom, kom uit die hart en dit is die dinge wat 'n mens onrein maak".

Brs en srs, wat die ongelowige mense ons hoor sê en ons sien doen, dit is die dinge wat in harte leef! En onthou wat leer die Here ons hier! Die ongelowige gaan die gelowiges altyd met valkoë dophou om te kyk waar hulle ons kan uitvang dat ons verkeerd optree. Petrus sê hulle sal van ons praat asof ons misdadiger is.

Wat is dit wat die ongelowige wêreld vandag oor gelowiges en oor die die kerk sê? Waarvan van ons gereeld beskuldig? (gee tyd vir antwoorde)

Ja, van skynheiligeid – dat ons Sondaer vroom hierdie in die erediens sit, maar in die week doen ons maar net so sonde soos ander mense!

Of dat ons altyd ander mense veroordeel! Of dat die kerk liefdeloos optree! Of dat die kerk altyd net krities is en nooit iets opbouend doen of sê nie! Of watter aanklagte ook al! Natuurlik is dit in sommige gevalle waar! Maar dit is nie die punt nie! Die Here sê vanmore vir ons dat ons hierdie aanklagte dood moet leef! Ons moet hulle stil leef met ons goeie lewenswandel as gelowiges dat hulle nie rede het om ons aan te kla nie! Hulle moet meer en meer die lewe Jesus in ons sien en daarom het Jesus ook vir ons 'n voorbeeld gestel toe Hy hier op aarde tussen sondaars kom leef het! "n Voorbeeld van liefde, diens, vergifnis, genade en vrede! Dit is wat die ongelowiges moet sien!

Want, sê die Here, daar kom 'n dag dat ons lewe van elke dag, hier en nou, tot 'n kragtige getuienis vir Hom gaan dien! Die dag as die Here Jesus weer kom en die gelowiges dan gaan besef dat God werklike bestaan en dat Jesus koning van die wêreld is, dan sal hulle besef dat ons gedrag en ons voorbeeld, die regte was en dan sal hulle God verheerlik! So – miskien mag jy voel dat jou lewe en gedrag nie nou veel van 'n verskil mag maak nie – maar weet – eendag sal mense aan jou dink en God verheerlik omdat hulle God in jou lewe gesien het, maar nie wou herken nie.

Maar geliefdes, onthou ook: elke keer wanneer iemand vandag tot bekering en geloof kom, elke keer wanneer iemand na ons toe kom en sê: ek wil ook deel van julle wees, dan was ons ons lewe 'n getuienis wat God verheerlik! Want die hemele juig as ongelowiges, buitekerklikes en afgedwaaldes terugkom na God toe!

Geliefdes, dis nie maklik om vandag 'n Christen te wees nie! Dis nie maklik om as vreemdeling en bywoner jou lewe as burger van God se koninkryk in hierdie wêreld te leef nie! Maar dit is die plek waar God ons geplaas het en dit is hier waar Hy wil dat ons in die regte vehouding met ongelowiges sal lewe!

Gaan daarom nou die week binne en onthou wie jy is! Jy is vreemdeling en bywoner! Jy is ‘n koningskind – ‘n burger van sy ryk! Sorg dat jou hart vol van sy Gees en sy wil is! En leef dan so dat ongelowiges ook nou jou sal verwys en sê: God is waarlik koning.

Amen